

## **Govor Nj.E. Dr. Harisa Silajdžića**

Uvažene ekselencije, dragi prijatelji, dame i gospodo,

Predstavlja mi izuzetno zadovoljstvo i čast da Vas u ime Predsjedništva Bosne i Hercegovine pozdravim na ovoj svečanosti, te da zaželim uspješnu izgradnju nove zgrade Ambasade Sjedinjenih Američkih Država u Bosni i Hercegovini.

Sjedinjene Države su svojim kontinuiranim prisustvom u Bosni i Hercegovini od najtežih dana u našoj istoriji pokazale izrazitu podršku za našu zemlju, njen napredak, i očuvanje njenog suvereniteta i teritorijalnog integriteta. Izgradnja ove zgrade simbolizira nastavak interesa Sjedinjenih Država za razvijanje i jačanje bilateralnih odnosa između naše dvije zemlje.

Prisan odnos između Bosne i Hercegovine i Sjedinjenih Američkih Država postoji od same nezavisnosti naše zemlje. Sjedinjene Države su među prvima priznale nezavisnost Bosne i Hercegovine, 7. aprila 1992. godine.

Diplomatski odnosi su uspostavljeni 6. augusta 1992. godine, a Ambasada Sjedinjenih Država je počela sa radom 10. novembra 1993. godine, unutar Američke ambasade u Beču. Prva Ambasada Sjedinjenih Američkih Država u Sarajevu otvorena je 4. jula 1994. godine, prilikom obilježavanja 218. godišnjice nezavisnosti SAD, u najtežim vremenima.

Toj ceremoniji prisustvovala je i Madeleine Albright, tadašnja ambasadorica SAD pri Ujedinjenim nacijama i prijatelj Bosne i Hercegovine. Osim što je tokom te posjete Sarajevu poslala podršku građanima opkoljenog Sarajeva riječima "Ja sam Sarajka", ambasadorica Albright je predvidjela buduće odnose između naše dvije zemlje, ustvrdivši: "Vaša budućnost i budućnost Sjedinjenih Američkih Država su nerazdvojne."

Njene riječi imaju još veću težinu skoro 14 godina kasnije, jer Sjedinjene Američke Države kontinuirano i sa jednakim intenzitetom podržavaju razvoj demokratskih vrijednosti, ljudskih prava i vladavine prava u Bosni i Hercegovini. Iskustvo naše dvije zemlje je također usko povezano. Građani Bosne i Hercegovine, kao i građani SAD, cijene i vjeruju u prednosti multietničkog društva, te se rukovode idejom suživota, uzajamnog poštovanja i tolerancije. Bosna i Hercegovina je bazirana na ovim idejama i vrijednostima već stotinama godina, a iskustvo iz bliske prošlosti samo potencira značaj zalaganja za i odbranu tih vrijednosti. U tom smislu, pomoći Sjedinjenih Država koje prirodno razumiju prednosti tih vrijednosti od

krucijalnog je značaja za dalji razvoj Bosne i Hercegovine kao funkcionalne, multietničke demokratije.

Bosna i Hercegovina nastoji uzvratiti pomoć koju Sjedinjene Države pružaju našoj zemlji, te postaje sve značajniji partner SAD na nizu polja. Vojnici naše dvije zemlje pomažu u očuvanju mira u nekoliko misija širom svijeta, a napredak Bosne i Hercegovine ka članstvu u NATO savezu predstavlja simbol opredijeljenosti naše zemlje i njenih građana za što čvršću saradnju sa Sjedinjenim Državama u zajedničkim naporima za mir, stabilnost, demokratiju i prosperitet na Balkanu i Evropi uopšte.

Uzajamni odnosi između naše dvije zemlje su iz godine u godinu sve bolji. Politička i strateška saradnja uvijek je bila prisutna i na izuzetno visokom nivou, a ekonomski i kulturna saradnja sve više jačaju, te se nadam da će se poslovni odnosi još više intenzivirati, pogotovo investiranjem američkih korporacija u projekte u Bosni i Hercegovini.

Koristim ovu priliku da se u ime građana Bosne i Hercegovine zahvalim

Sjedinjenim Državama za nesebičnu podršku, te za odlučnost da nastavite aktivan angažman u našoj zemlji. Pored zahvalnosti trenutnom Ambasadoru, Nj.E. Englishu, zahvalnost također dugujemo prethodnoj šestorici ambasadora SAD koji su obavljali svoju dužnost u našoj zemlji, prvi od kojih je doživio i prezivio dnevna granatiranja i druge opasnosti skupa sa građanima Sarajeva. Sjedinjenim Državama dugujemo posebnu zahvalnost zbog zaustavljanja dalje destrukcije i ubijanja u Bosni i Hercegovini i to je nešto što nikada nećemo zaboraviti.

Dozvolite mi sada da izrazim duboku zahvalnost Robertu Frasureu, Josephu Kruzelu i Nelsonu Drewu koji su dali svoje živote da bi nama donijeli mir. Njihovim porodicama želim reći: "Uvijek ćemo se sjećati vašeg gubitka i njihove žrtve".

Na kraju, Vaša Ekselencijo, dozvolite mi da iskažem svoje zadovoljstvo polaganjem kamena temeljca, te nadu za uspješnu izgradnju nove zgrade Ambasade Sjedinjenih Američkih Država u Bosni i Hercegovini. Današnja ceremonija i nova zgrada na najbolji mogući način simboliziraju prijateljstvo naše dvije zemlje, te nastavak dobrih bilateralnih odnosa i jake saradnje na nizu polja.